



## Bijeg k Allahu (Meka)

Hatib: dr. Abdullah ibn Avad el-Džuheni

27. rebiul-evvel 1447. po Hidžri / 19. septembar 2025.

Hvala Allahu! Njega hvalim, od Njega pomoć, oprost i uputu tražim. Vjerujem u Njega i ne poričem Ga, protivnik sam onome ko Ga poriče. Svjedočim da nema boga osim Allaha, Jedinog, Koji nema sudruga, i svjedočim da je Muhammed, sallallahu alejhi ve sellem, Njegov rob i poslanik. Poslao ga je s uputom, istinitom vjerom, svjetlom i mudrim savjetom, nakon što je neko vrijeme prekinuto slanje poslanika, u vremenu oskudice znanja, zablude među ljudima, približavanja Sudnjeg dana i blizine kraja. Ko se pokori Allahu i Njegovom Poslaniku, taj je na pravom putu, a ko se suprotstavi Allahu i Njegovom Poslaniku, taj je zalutao, propustio priliku i skrenuo u daleku zabludu.

Bojte se Allaha, On vas nije stvorio uzalud, niti je vas i ono što radite ostavio bez nadzora. Spasio se onaj ko se pokori svome Gospodaru, iskreno Mu se obrati i izvršava Njegove naredbe na potpun i propisan način, a propao je i izgubio onaj ko je svoj život potrošio uzalud, i protraćio svoje vrijeme, bez pokornosti Allahu.

O ljudi, budući da čovjek mora napustiti ovaj svijet i preći na drugi svijet, Gospodar svjetova poslao je poslanike između ljudi, da ih upoznaju s kućom u koju će se preseliti, i da im opišu put koji vodi do nje. Uzvišeni Allah objavio je Svome poslaniku Muhammedu, sallallahu alejhi ve sellem, brojne sažete, jasne, iscjeljujuće i dovoljne opise Sudnjeg dana, nestanka cijelog svijeta, i onoga što dolazi nakon toga, od proživljenja pa do konačnog prebivališta svakog čovjeka.

Uzvišeni, Koji je najskreniji govornik i Čije su riječi najveća istina, kaže: "I u rog će se puhnuti, i umrijet će oni na nebesima i oni na Zemlji, ostat će samo oni koje Allah bude odabrao; poslije će se u rog po drugi put puhnuti i oni će, odjednom, ustati i čekati. I Zemlja će svjetlošću Gospodara svoga zasjati i Knjiga će se postaviti,





vjerovjesnici i svjedoci će se dovesti, i po pravdi će im se svima presuditi, nikome se neće nepravda učiniti; svako će dobiti ono što je zaslužio, jer On dobro zna šta je ko radio. Oni koji nisu vjerovali u gomilama će u Džehennem biti natjerani, i kad do njega dođu, kapije njegove će se pootvarati i čuvari njegovi će ih upitati: 'Zar vam nisu dolazili vaši poslanici, koji su vam ajete Gospodara vašeg kazivali i opominjali vas da ćete ovaj vaš Dan doživjeti?' 'Jesu', reći će oni, 'ali još je davno određeno da će nevjernici kažnjeni biti.' I reći će se: 'Ulazite na džehennemske kapije, vječno ćete u njemu boraviti!' Grozna li prebivališta onima koji su se oholili! A oni koji su se Gospodara svoga bojali u povorkama će u Džennetu biti povedeni, i kad do njega dođu – a kapije njegove već širom otvorene – čuvari njegovi će im reći: 'Mir vama, od grijeha ste čisti, zato uđite u nj, u njemu ćete vječno boraviti!' I oni će reći: 'Hvala Allahu, Koji nam je obećanje Svoje ispunio i u Džennetu nam mjesto darovao, da se u njemu nastanimo gdje hoćemo!' Divne li nagrade onima koji su se trudili! I vidjet ćeš meleke kako Prijesto okružuju, veličajući i hvaleći Gospodara svoga; i svima će se po pravdi presuditi i reći će se: 'Hvaljen neka je Allah, Gospodar svjetova!'" (Ez-Zumer, 68–75)

O vjernici, razmislite o ovim ajetima s kraja sure Ez-Zumer. Upoznajte se s njihovim značenjem i razmišljajte o Allahovoj veličini i savršenoj moći, kako biste bili potpuno uvjereni da je On Jedan, Jedini, utočište je svakome, nije rodio niti je rođen, i niko Mu nije ravan. On je Živi, Samoopstojni, nema sudruga, pomagača niti savjetnika. Sva stvorenja su u Njegovoj vlasti i pod Njegovom kontrolom. On ih vidi, čuje njihove riječi, zna njihove tajne i šapate. Zato, poštovani vjernici, nije dozvoljeno da čovjek uzima posrednika između sebe i svoga Gospodara, Uzvišenog, jer On je blizu nama, bliži nam od naše žile kucavice. On je odvojen od Svojih stvorenja, uzvišen nad Svojim Aršom. Uzvišeni kaže: "Niko nije kao On, On sve čuje i sve vidi." (Eš-Šura, 11)

Zato, bojte se Allaha, o muslimani, svoje nade polažite samo u Njega, obraćajte Mu se u svim stvarima, prisjećajte se Njegove veličine i moći u svakom stanju. Tražite od Njega pomoć i ispunjenje potreba, jer On upravlja sudbinama svih stvari, riznicama





nebesa i Zemlje i ključevima svega. Sve, mimo Njega, Njegovo je vlasništvo, zato Mu se iskreno obratite. Oni mimo Njega ne mogu nanijeti ni štetu ni priskrbiti korist, osim ako to Allah dozvoli. Uzvišeni kaže: "Milost koju Allah podari ljudima niko ne može uskratiti, a ono što On uskrati niko ne može, poslije Njega, dati; On je silan i mudar." (Fatir, 2)

O vjernici, zaštitite se Allahovom Knjigom i sunnetom Njegovog Poslanika, alejhis-salam, od novotarija. Obožavajte Allaha sa znanjem i jasnim dokazom, bojte Ga se i budite svjesni Njegovog nadzora, jer On vas vidi i čuje. Neka vaši prohtjevi budu u skladu s onim s čim je došao Njegov Poslanik, neka su na njega najbolji salavat i najpotpuniji selam. Povećajte izgovaranje riječi "la ilahe illallah", jer su one ključ Dženneta. Ostvarite njihovo značenje u svojim srcima i djelima.

Donosite salavat i selam na našeg plemenitog Poslanika, jer vam je to naredio vaš Gospodar: "Allah i meleki Njegovi blagosilju Vjerovjesnika. O vjernici, blagosiljajte ga i vi i šaljte mu pozdrav!" (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

